

全宋詩輯補

湯華泉 輯撰

第二冊

黃山書社

# 全宋詩輯補

全宋詩  
輯補

湯華泉

輯撰

第二冊

黃山書社

# 釋智圓

〇一四九七

## 西方淨土贊

曰天理湛寂，詎可以淨乎穢乎，延乎促乎，彼乎此乎，而思量擬議者哉？然而悟之則爲聖，爲真，爲修德，爲合覺，爲還源，爲涅槃，迷之則爲凡，爲妄，爲性德，爲合塵，爲隨流，爲生死。大矣哉！聖人之先覺也，憫其未覺焉，於是乎土現清淨，壽延無量，端拱東向，而慈眼無偏視，俾我群迷厭穢而忻淨，惡此娑婆而取彼瞻養矣。既而升寶剎，覲法王，目神變，耳妙訓，則湛寂之性，不遠復矣。達十方太虛，悉我心現，矧依空之土，復何有哉？噫，如是證悟者，孰不由其厭穢忻淨，惡促好延，捨此取彼之心而致乎，而況達忻厭而無忻厭，了好惡而無好惡，知取捨而無取捨者耶？是故釋迦現穢土而俾厭，彌陀現淨土而俾忻，其有旨哉！吾慈母馬氏，生厭穢境，死忻淨剎，壽七十有一而終。寢疾之際，以所造淨土無量壽像，囑吾以供養承事焉，十載於茲矣。嗚呼，母人之德，其在免于溺墜水火而已。而吾母也，始能捨吾爲佛徒，次能資吾以學法，末又約吾以往生，是能誨我於道也。蓼莪之嘆，風樹之悲，歲月其邁，而吾心不衰。遂齋莊馨爐，染毫作淨土贊，庶佑我母陟乎聖階。

覺海澄圓，廣大無邊，無促無延。其一。

群蒙失道，自劫家寶，生死浩浩。其二。

大覺軫慈，淨國爰居，俾我來思。其三。

金臺既升，睹佛儀形，悟我妙明。其四。

像以相睹，贊以道取，福我慈母。其五。《樂邦文類》卷二。

### 龍昌期

〇一五八二

### 應王荆公命咏軍人運沙

茫茫黃出塞，漠漠白鋪汀。鳥去風平篆，潮回日射星。雍正《四川通志》卷四六《詩話》云：「仁壽龍昌

期初謁王荆公，值軍人運沙，令賦之。」

### 上朱臺符

洗硯書名紙，磨錢擲卦爻。侯門千萬仞，應許野僧敲。《呂氏雜記》卷下，謂龍昌期少時爲僧謁朱臺

符作。

周啓明

○一五八四

仙都二首

鼎湖深幾許，斗立向空牢。霹靂削不得，芙蓉生更高。飛升須駕鶴，負荷欲憑鰲。千仞□□□，何當繼我曹。

崑崙撐天一柱雄，遙看高與步虛同。待登絕隴觀華頂，又見巍巍峻插空。《仙都志》卷下。

章得象

○一五九一

端午帖子

桃印敞金扉，鳴環繭館歸。

赤符神印穿人縷，團扇鮫綃畫鳳文。  
《古今事文類聚》前集卷九。

天台

台嶺攀仙桂，桃源訪舊花。

水流玉洞桃花出，風過星壇桂子飄。  
《記纂淵海》卷九台州。

杜衍

〇一五九六

錢毛洵中書判拔萃科歸省

判就十題彰敏妙，學窮千古見兼該。《獨醒雜誌》卷一。

釋齊岳

〇一六〇三

頌古

南泉玩月次，趙州指月問曰：『何時得恁麼？』師曰：『王老師二十年前亦恁麼來。』曰：『祇今作麼生？』師便歸方丈。

劍落寒潭謾刻舟，霜花浪急使人愁。漁翁罷釣歸深塢，一隻鴛鴦落渡頭。《禪宗頌古聯珠通集》卷一一。

地藏玩月曰：「雲動有？雨去有？」僧曰：「不是雲動是風動。」師曰：「我道雲亦不動，風亦不動。」曰：「和尚適來又道雲動。」師曰：「阿誰罪過？」

雲生洞裏陰，風動林間響。若明今日事，半斤是八兩。同上卷三五。

### 答僧問上方境

碎雲點出千峰秀，迸石泉流萬古清。

紅蓮座上江南客，白玉池邊碧眼胡。

### 答僧問四料簡

如何是奪人不奪境？永夜明堂空有月。如何是奪境不奪人？詞清越席談今古。如何是人境俱奪？山河萬類沉滄海。如何是人境俱不奪？少年公子捲珠簾。

### 答僧問

應是乾坤惜，不教容易開。

香透碧波敷水面，葉鋪金沼覆鴛鴦。



在舍祇言爲容易，臨筌方覺取魚難。

平原青草合，富貴幾人休？

年高春睡晚，病久出山遲。《建中靖國續燈錄》卷三。

穆脩

○一六〇七

聞丁謂量移道州

却訝有虞刑政失，四凶何事亦量移？《東軒筆錄》卷三。

呂夷簡

○一六二二

楚泉

地與分雙派，天方鬥二雄。《方輿勝覽》卷四八《濠州》。

釋重顯

〇一六三三

偈

從天降下，從地涌出。南北東西，一棚俊鶻。顧杼停機，苦屈苦屈。

映眼時，若千日，萬像不能逃影質。凡夫祇是未曾觀，何得自輕而退屈。

太阿橫按祖堂寒，千里應須息萬端。莫待冷光輕閃爍，看看。

清峻孤根別有靈，勢含山水自分明。提來勝得豐城劍，報盡人間兩不平。

一徑直，二周遮。衲子辯得，眼裏生華。

雪竇得與麼長，諸人得與麼短。若人道得齊肩句，許伊把定乾坤使。

答僧問

出門唯恐不先到，當路有誰長待來？

四溟無浪月輪孤，依舊漁翁把釣竿。《明覺禪師語錄》卷一。

## 贈天衣長老

天衣長老，無價之寶。金烏東升，是何杲杲？他年或要兒孫，無端須入荒草。

## 寄妙果政長老

有叟機宜太孤絕，冷淡情懷止金鐵。游歷不知參訪誰，曾道天無第二月。近聞鎖斷奔馳問，何物拈來固其本？飛騰直上三十三，見不見兮爲君困。中岩藏晦亦枯槁，年光休競七十九。南北東西追古風，時有其人繼其後。

## 送宗侍者

深憶韶陽示奇句，昔人到此猶不住。宗禪九萬曾列程，吾想七閩還獨步。重岩忽爾來扣門，自謂孤踪若斷雲。雪庭乍遠雖多恨，且有中峰月共分。斯句乃宗禪者離山日有作。如斯慷慨非希冀，浩浩清風無處避。天上天下知不知，五葉千燈復何啻？

小溪贈溥禪者

歲月將闌，天光普寒。鄙叟復枕，盤桓且難。萬杉禪客來尋我，言意勤勤勉清墮。拂曙片帆重率歸，百節四肢難負荷。風之泠泠，潮之平平，強寫離辭幾不成。岩層落落舊知己，相見無忘極此情。

送清禪者

有禪者兮曠發靈機，出洪都兮聲光步隨。一文一技不爲用，方內方外誰論之？春風來兮何所別，何曾拂盡古岩雪？極目寥寥思遠人，曹溪堪共此時（節）〔節〕。清兮清苦宜存歷，亮兮辜馬休同迹。彈指凋殘六葉華，西山一去斷消息。

送一禪者

天得一，地得一，王得一兮無等匹。谷得一兮歸巨溟，應見三山皆岌岌。一得一，又何必，今古不曾居丈室。千華影裏復是誰，八面風清照紅日。一禪一禪須記取，象骨齡難兮且相許。負石投針忽載來，拂袖雙雙便回去。

### 送全禪者

有龍彪兮時之相宜，有藝行兮人之所歸。東西武步兮復誰是我，上下觀方兮存機未機。全禪全禪知不知？大施門開兮，塵區可依。

### 送靜山水

松根石上曾唯我，四顧寥寥誰未可。豈知白鳳傳好音，拋却亂雲千萬朵。溪山重疊春將暮，風遞殘華柳飛絮。金盃待月應有期，寶冠照水寧無據？靜禪復記吾深囑，彼兮國士真烈宿。相見從容莫等閑，人天景行存高躅。

### 寄藏主收禪者

新州出個賣樵者，龍朔年中藏晝夜。黃梅春得古菱華，不倚物兮便高（拄）「掛」。秀禪拂拭無塵埃，歷盡諸難眼未開。交馳石上求文字，爭得孤峰却載來？近還有個尋吾祖，云在（廬）「廬」村深處住。偷得鄰家些子光，用作千燈擬流布。呵呵呵，地久天長爭奈何！

送雲禪德

中岩老兮八十一，閑寄十年助辭筆。縱誇步驟當此時，豈免龍鍾笑他日。他時誰也流機變，午夜寒蟾生水面。別有清光何處來，舉目亂飛星斗轉。歌兮歌兮苦搜索，遠贈雲禪愧標格。黃梅席上追古風，高唱自知天地窄。

贈陸學士

古之陸大夫，多集游方輩。今之陸使君，復與空生會。大國正搜羅，長劍今磨淬。或問清曠閑，不知若爲對。

舟行

孤舟選勝傍江干，乘興幽游思未闌。向日望來春色晚，順潮歸去野情寬。高歌釣客收綸綫，弄影沙禽刷羽翰。回想古祠無限意，海蟾初上逼人寒。

東軒偶作

叢竹小山些子境，偶來閑坐解疏慵。怡然縱目誰知我，勝入摩雲千萬峰。

偈

日日日東上，日日日西沒。循環三百六十，幾個解知窠窟。放開精精冥冥，把定恍恍惚惚。君不見毗耶離城，彼上人一室，寥寥是何物？

頭上皚皚，脚下皚皚。金色尊者，獨上高臺。開眼造罪，合眼受災。如何如何，天網恢恢。物中眼，眼中物。十方如來，同此起出。

一處起，千處百處沒。一處息，千處百處不識。

以字不成，八字不是。優曇華正開，嗅着無香氣。翻笑釣魚船上客，不愛南山愛鰲鼻。

春山迭亂青，春水漾虛碧。寥寥天地間，獨立望何極。《全宋詩》釋雲岫誤收此偈。

大無外，小無內。半合半開，成團成塊。老胡既隔絕，衲子多違背。從他千古萬古長漫漫，填溝塞壑没人會。

一不定，二不可。上下四維，春風包裹。桃華杏華門開，柳條桑條慙破。可憐昔日靈雲，剛

道迷逢達磨。

春力不到處，枯樹亦生華。九年人不識，幾度過流沙。

馬祖升堂，百丈捲席。正令不從，拗曲爲直。

世事悠悠，不如山丘。卧藤蘿下，塊石枕頭。

不得春風華不開，華開又被風吹落。爾若明得褒貶句，未必善因，而招惡果。

古人道，其爲也形，其寂也冥。轉變天地，自在縱橫。河沙而用，混沌而榮。誰聞不喜，誰聞

不驚。如何以無價之寶，隱在陰人之坑。

巢知風，穴知雨。靈利衲僧，未可相許。若問如何，苦哉佛陀。

雪覆蘆華欲暮天，謝家人不在漁船。白牛放却無尋處，空把山童贈鐵鞭。

### 偈句

直得動地雨華，何如歸堂向火。

不打鼓上去不得，把却門人來不得。

善財別後誰相訪，樓閣門開竟日閑。

人林不動草，人水不動波。



一切不是句，瞎却時人眼。

寶山到也須開眼，勿使茫茫空手回。  
不如策杖歸山去，長嘯一聲烟霧深。  
胡蜂不戀舊時窠，猛將不在家中死。  
不着便也不奈何，爾從江南江北來。  
禪河隨浪靜，定水逐波清。同上卷二。

### 偈

開口了，合不得。合口了，開不得。

臘月燒山，萬種千般。翹松鶴冷，踏雪人寒。達磨不會，大難大難。

### 偈句

寧可碎身若微塵，終不瞎個衆生眼。  
設使羚羊未掛角，也似萬里望鄉關。  
莫謂水寒魚不食，如今釣得滿船歸。同上卷三。